

## Ein Woord up platt

### Mien Börkum hebb ik leiv...


Well van de Badegasten de Olde Toorn  
umhoog will - de olde Baas is elke Dag open  
- sücht bi de Ingang ein Bild ut Metall mit de  
Kopp un de Levenstied van ein besünder  
Börkumer Mann. Sien Name was Albert Bakker,  
man alle Lü seen van Appi Land, umdat heej as  
Gärtner völ mit Blaumen un Planten tau daun  
harr.

Twinteg Jahr was heej Vörsitter van de  
Heimatverein un hett hier Sporen achterlaten.  
Tiss sien Verdeinst dat de Olde Toorn weer so  
prachdeg un moij midden in't Dörp steiht. Man  
bitau sien dageliks Wark hett heej Bilder malt,  
Theaterstückjes und Gedichten skreven un uk  
Leiden dichtet un komponiert. Dat Börkumer  
Platt lagg hum an't Hart un uk disse moje  
Woorden hett heej achterlaten:

Ik bin bliede, dat ik plattdüts kann  
un dat ji mi verstahn.  
Helpt mit, dat unse Maudersprake  
noit mag undergahn!

Waakt mi de Sünne ut de Slaap,  
segg ik hör: Gauden Mörge!  
Ik weit neit, off seej Platt versteiht,  
man dat bin neit mien Sörge!  
Ik bin bliede...

Uk mit mien Hund, mien beste Fründ,  
proot alltied ik bloot Platt.  
Wi twee verstahn uns allerbest,  
weil heej uk plattdüts blafft.  
Ik bin bliede...



De Koopmann in de grote Straat  
versteiht uns Platt noch gaud.  
Heej weit, wat groue Arten sind,  
wat Tuffels bin un Straup.  
Ik bin bliede...

Wenn mörgens ik na't Skaule mutt,  
röppt Mauder mi faak na:  
Verwessel bloot neit mir un mich.  
Mien un Dien, dat weißt du ja!  
Ik bin bliede...

Ik muß mal na de Doktor hen.  
Mien Faut dee seer bi't Loopen.  
Heej see, dat ik ein Plattfaut harr.  
Kummt dat van't Plattdüts proten?  
Ik bin bliede...

Un uk mien lüttje Nachtgebett  
hört sück uns Heergott an.  
Un ik bin daarvan overtügt,  
dat heej uk Plattdüts kann!  
Ik bin bliede...